

ugur. Þá er ósannað, að stefnandi hafi farið fram á endurupptöku málsins fyrr en á árinu 1979, svo sem áður er rakið. Verður kröfugerð á hendur fjármálaráðherra og dómsmálaráðherra ekki byggð á því, að synjað hafi verið um endurupptöku málsins.

Samkvæmt því, sem hér hefur verið rakið, verða stefndu sýknaðir af kröfum stefnanda.

Eftir öllum atvikum verður málskostnaður látinn falla niður.

Kostnaður stefndu K greiðist úr ríkissjóði, þar með talin málflutningslaun skipaðs talsmanns hennar, Svölu Thorlacius héraðsdómslögmanns, kr. 600.000.

Guðmundur Jónsson borgardómari kvað upp dóm þennan.

D ó m s o r ð:

Stefndu, K, dómsmálaráðherra f. h. dómsmálaráðuneytisins og fjármálaráðherra f. h. ríkissjóðs, skulu vera sýkn af kröfum stefnanda M í máli þessu.

Málskostnaður fellur niður.

Kostnaður stefndu K greiðist úr ríkissjóði, þar með talin málflutningslaun skipaðs talsmanns hennar, Svölu Thorlacius héraðsdómslögmanns, kr. 600.000.

Mánnudaginn 6. júní 1983.

Nr. 109/1981. **Sigurjón Ari Sigurjónsson**

(Brynjólfur Kjartansson hrl.)

gegn

Ragnari Halldóri Hall, skiptaráðanda

í Reykjavík f. h. þrotabús Pryms h/f

(Jón Steinar Gunnlaugsson hrl.).

Gjaldþrotaskipti. Frávísun. Sératkvæði.

Dómur Hæstaréttar.

Mál þetta dæma hæstaréttardómararnir Magnús Þ. Torfason, Björn Sveinbjörnsson, Halldór Þorbjörnsson og Magnús Thoroddson og Guðrún Erlendsdóttir, settur hæstaréttardómari.

Áfrýjandi hefur áfrýjað máli þessu með stefnu 30. apríl 1981. Hann krefst þess, að krafa sín að fjárhæð 27.058.50 krónur verði viðurkennd sem forgangskrafa í þrotabú Þryms h/f. Hann krefst einnig málskostnaðar fyrir Hæstarétti.

Stefndi krefst staðfestingar hins áfrýjaða úrskurðar og málskostnaðar fyrir Hæstarétti.

Nokkur ný skjöl hafa verið lögð fyrir Hæstarétt.

Á skiptafundi í þrotabú Þryms h/f 10. febrúar 1981 kom fram, að Eiríkur Tómasson héraðsdómslögmaður hefði verið ráðinn bústjóri til bráðabirgða, sbr. 86. gr. gjaldþrotalaga nr. 6/1978. Lögmaðurinn var síðan kosinn skiptastjóri á fundi þessum, sbr. 1. mgr. 90. gr. nefndra laga. Samkvæmt 1. mgr. 91. gr. sömu laga skal skiptastjóri vera umboðsmaður búsins fyrir dómstólum. Bar því að stefna honum fyrir Hæstarétt í máli þessu f. h. þrotabúsins, en ekki aðeins skiptaráðanda samkvæmt 1. gr. laga nr. 19/1895. Þar sem það var ekki gert, ber að vísa málinu frá Hæstarétti ex officio.

Rétt er, að málskostnaður fyrir Hæstarétti falli niður.

D ó m s o r ð:

Máli þessu er vísað frá Hæstarétti.

Málskostnaður fyrir Hæstarétti fellur niður.

S é r a t k v æ ð i

Magnúsar Thoroddsen hæstaréttardómara.

Ég er ósammála meiri hlutanum í því að vísa máli þessu frá Hæstarétti, þar eð ég tel, að dæma meg þáð að efni til. Gjaldþrotalög nr. 6/1978 fella ekki úr gildi lög nr. 19/1895 um stefnur til æðri dóms í skiptamálum. Tel ég því nægilegt að stefna skiptaráðanda f. h. þrotabúsins, enda er hagsmunum kröfuhafa borgið með því. Verður því ekki talið, að réttarfarsnauðsynjar bjóði, að skiptastjóra sé einnig stefnt f. h. þrotabúsins, enda er valdsvið hans undir skiptaráðanda og hans eftirlit sett. En úr því að meiri hlutinn vill vísa málinu frá Hæstarétti, kemur eigi til þess, að ég lúki efnisdómi á málið.

Úrskurður skiptaréttar Reykjavíkur 20. mars 1981.

Mál þetta var tekið til úrskurðar fyrr í dag.

Með úrskurði, uppkveðnum 13. október 1980, var bú Þryms h/f, Reykjavík, tekið til gjaldþrotaskipta. Innköllun til skuldheimtumanna birtist fyrri sinni í Lögbirtingablaði, sem út kom 5. nóvember 1980.

Sóknaraðili máls þessa, Sigurjón Ari Sigurjónsson, Stuðlaseli 8, Reykjavík, hefur með bréfi, dagsettu 25. nóvember 1980, lýst kröfu í búið. Segir m. a. í kröfulýsingu hans:

„... Krafan grundvallast á dómi bæjarþings Reykjavíkur í málinu nr. 5929/1980 Sigurjón Ari Sigurjónsson gegn Vélsmiðjunni Þrym h/f, en mál þetta var höfðað til staðfestingar á löghaldi, sem fram fór þann 22. apríl s.l. til tryggingar kröfu þessari. Dómsorðið hljóðar svo:

„Framangreint löghald er staðfest fyrir dómkröfu.

Stefndi Vélsmiðjan Þrymur h/f greiði stefnanda Sigurjóni Ara Sigurjónssyni kr. 1.645.616.- með 31% ársvöxtum frá 1. maí 1980 til greiðsludags og kr. 221.200.- í málskostnað, allt innan 15 daga frá lögbirtingu dóms þessa, að viðlagðri aðför að lögum.“

Til viðbótar dómkröfu þeirri, sem hér er lýst, er krafist launa vegna uppsagnarfrests, en réttur Sigurjóns er til launa í uppsagnarfresti í 3 mánuði. Hér er gerð krafa um laun í uppsagnarfresti tímabilið frá 30. apríl 1980, er hann hættir störfum, og til 24. júní 1980, er hann byrjar starf annars staðar, og nemur sú krafa kr. 2.616.950.-.

Einngi er gerð krafa um greiðslu mismunar á þeim launum, er Sigurjón hafði hjá Vélsmiðjunni Þrym h/f, og þeirra launa, er hann hafði í hinu nýja starfi, en þau laun voru verulega lægri. Er sú krafa fyrir tímabilið frá 25. júní 1980 til loka uppsagnarfrestsins, þ. e. 1. ágúst 1980, og nemur sú krafa kr. 688.900.-. Kröfum þessum er nánar lýst í meðfylgjandi bréfi Sigurjóns Ara Sigurjónssonar.

Gerð er krafa til vaxtagreiðslu, eins og í bréfinu er lýst.

Auk þess er hér með krafist greiðslu á málskostnaði kr. 221.200.-, innheimtukostnaðar vegna síðari hluta kröfu kr. 278.942 og vegna móts í skiptarétti kr. 19.000.-, allt samkvæmt gjaldskrá L.M.F.Í.

Launakröfu þessari er lýst í gjaldþrotabúið sem forgangskröfu. . .“

Skiptaráðandi ritaði sóknaraðilja bréf 9. febrúar 1981, þar sem tilkynnt er, að skiptaráðandi hafi tekið þá afstöðu til kröfunnar, að hafna beri viðurkenningu að því er varðar kr. 6.000.00 og að hafna beri að svo stöddu viðurkenningu að því er varðar kr. 27.058.50. Jafnframt er í bréfi þessu tekið fram, að til þess að vaxtakrafa komi til álita á kröfuskra, þurfi að greina fjárhæð hennar á upphagsdegi skipta. Var sóknaraðilja gefinn frestur til að bæta úr eða rökstyðja kröfur sínar frekar til 20. sama mánaðar. Áður, eða með bréfi, dags. 4. febrúar 1981, hafði sóknaraðilja verið til-

kynnt, að endanleg afstaða til lýstra krafna yrði tekin á skipafundi 27. sama mánaðar.

Hinn 10. febrúar 1981 barst frá sóknaraðilja bréf vegna vaxtakröfu hans. Þar segir m. a.:

„. . . Hér með sendast yður upplýsingar um upphæð vaxtakrafna hinn 13. október við upphaf skipta í þrotabúi Vélsmiðjunnar Þryms h.f. hjá eftirgreindum kröfuhöfum. . . Sigurjón Ari Sigurjónsson, vextir gkr. 434.773.-, lögh.kostn. gkr. 7.028.- . . .“

Önnur gögn bárust skiptaráðanda ekki fyrir 20. febrúar 1981 varðandi kröfu sóknaraðilja.

Skrá yfir lýstar kröfur, gerð samkvæmt 108. gr. gjaldþrotalaga nr. 6/1978, var lögð fram á skiptafundi 27. febrúar 1981. Var framangreind afstaða skiptaráðanda til kröfugerðar sóknaraðilja þar tilgreind óbreytt frá því, sem sóknaraðilja hafði verið áður tilkynnt um. Voru þá af hálfu sóknaraðilja lögð fram ný gögn varðandi þann þátt kröfugerðar hans, sem skiptaráðandi hafði að svo stöddu ekki fallist á, að tekinn skyldi til greina, og þess um leið krafist, að margnefnd krafa um, að laun sóknaraðilja í uppsagnarfresti verði með úrskurði tekin til greina sem forgangskrafa. Af hálfu annarra kröfuhafa, sem mættir voru á fundinum, var kröfugerð sóknaraðilja ekki andmælt, og eru engar kröfur gerðar í máli þessu af hálfu varnaraðilja.

Leggja verður úrskurð á mál þetta samkvæmt 118. gr. laga nr. 85/1936 samkvæmt framlögðum skjölum og skilríkjum og málsútlistun sóknaraðilja.

Með upphaflegri kröfulýsingu sóknaraðilja fylgdi skýrsla hans sjálfs, þar sem fram kemur, hvernig umræddar fjárhæðir eru reiknaðar. Segir þar m. a.:

„. . . Frá . . . 30. apríl 1980, ber mér með réttu 3ja mánaða laun, þar sem mér hafði ekki verið sagt upp störfum. Hins vegar réðst ég til starfa til Rafiðjunnar h.f. sem framkvæmdastjóri hinn 26. júní og tel mig þar af leiðandi eiga rétt til launa til þess tíma ásamt mismun þeirra launa, sem ég fæ hjá Rafiðjunni frá 26. júní 1980 til 1. ágúst 1980, þar sem þau laun, sem ég fæ nú, eru lægri en ég hafði hjá velsmiðjunni Þrymur h.f. Launa-kröfur mínar eru því eftirfarandi: . . . Laun fyrir vikurnar:

30. apríl til 6. maí 1980	kr. 241.522
7. maí til 13. maí 1980	— 241.522
14. maí til 20. maí 1980	— 241.522
21. maí til 27. maí 1980	— 241.522
28. maí til 3. júní 1980	— 241.522

(Hinn 1. júní verður 11.7% hækkun launa).

4. júní til 10. júní 1980	kr. 269.780	
11. júní til 17. júní 1980	— 269.780	
18. júní til 24. júní 1980	— 269.780	kr. 2.016.950
Mismunur launa frá 25. júní til 1. ágúst 1980, 5 vikur á		
269.780 — 1.348.900, að fráðregnum launum mínum hjá		
Rafiðjunni h.f. frá 26. júní til 1. ágúst 1980, kr. 660.000	kr. 688.000	
..... Reykjavík, 26. nóvember 1980“		

Auk skýrslu þessarar fylgdi kröfulýsingunni vottorð Rafiðjunnar h/f um, að sóknaraðili hafi byrjað störf hjá því félagi 26. júní 1980.

Þau gögn, sem af hálfu sóknaraðilja voru lögð fram á skiptafundinum, eru auk gagna, sem áður höfðu komið fram, ljósrit af launaseðlum merktum sóknaraðilja, bæði frá Rafiðjunni h/f og Þrym h/f, svo og „yfirlit yfir hækkanir, sem orðið hafa á kaupum frá samningum 22.6. 1977.“

Samkvæmt launaseðlum frá Þrym h/f hefur sóknaraðili fengið eða átt að fá greidd laun vikulega. Ekki kemur þar fram, hvernig fjárhæð launa er fundin, heldur er þar einungis greint nafn launþegans og fjárhæð viku-kaupsins.

Engin gögn hafa verið lögð fram í málinu um, hver launakjör sóknaraðilja voru, meðan hann starfaði hjá Þrym h/f, hvorki kjarasamningur, ráðningarsamningur né neitt annað, er styður einhliða fullyrðingu hans um, að honum beri laun fyrir uppsagnarfrest af eignum búðins. Er af þeirri ástæðu eigi unnt að fallast á kröfugerð hans í máli þessu.

Ragnar Halldór Hall borgarfégeti kvað upp úrskurð þennan.

Ú r s k u r ð a r o r ð:

Kröfu sóknaraðilja, Sigurjóns Ara Sigurjónssonar, er hafnað.